

Ze barri?

ESKORIATZA / Egubakoitza / 2005eko abenduaren 16an / 235. zenbakia

KOORDINATZAILEA: Iker Barandiaran • Otolara 31 ARRASATE 20500 • Tel.: 943 71 25 11 • Faxa: 943 71 23 89 • Posta elektronikoa: zebarri@goiena.com • Lege gordailua: SS200/99

Herriko merkatariek Gabonetako kanpaina abiarazi dute, bigarren aldiz

IKER BARANDIARAN

Herriko merkataria eta zerbitzuek Gabonetako kanpaina abiarazi dute astean. Bezeroen artean hainbat txartel banatu dituzte eta Errege Eguna-ren bezperan zozketa egingo dute. Irabazleak herrian gastatu beharreko 1.500 euro eta afaria jasoko ditu.

Azkeneko urteotan Eskoriatza-ko saltzaileek eta bestelako zerbitzuak eskaintzen dituztenek apustu gogorra egin dute bezeroei esker ona emateko eta eskoriatzarrek herrian erosketak egin ditzaten bultzatzeko.

Joan den urtean, Gabonetako kanpaina egin zuten lehengo aldiz eta oso harrera ona izan zuen. Zozkatu zuten saria honako hau zen: herriko saltokietan gastatu beharreko 1.000 euro eta afari bat, hain zuzen ere. Bezeroek oso ondo hartu zuten ekimena, eta saltzaileak ere gustura gelditu ziren.

AURTEN SARI HANDIAGOA

Aurten, berriz, merkatariek esfortzua egin dute sari handiago eskaintzeko, eta lortu dute: 1.500 euro eta afaria emango diote sarituari.

Txartel horiek ez dituzte egingo gastuaren arabera emango. Horren ordez, saltzaileek bezeroen artean banatu dituzte.

Herrian ez dago berezko dendari edo merkatarien elkarterik, baina antzeko funtzionamendua dute. Izan ere, urtean hainbat alditan batzen dira, eta hainbat ekimen antolatzen dituzte.

Orain dela gutxi, azaroaren 19an hain justu, galako afaria egin zuten 22 merkatarik. "Herria apur bat girotu eta dotoretasuna emateaz gain, afari gure artean egitasmoak adostu eta eztabaidatzeko erabili genuen", azaldu ziguten.

URTEAN, LAU EKITALDI NAGUSI

Hain zuzen ere, urtean lau ekitaldi nagusi egin dituzte merkatariek: Aratusteetan, urtero,

bazkaria egiten dute, eta txantxa giroan zeresana ematen dute herrian; udaberrian, loreak oparitu eta saldu egiten dituzte herriko plazan; udazkenean, galako afaria; eta Gabonetan, zozketa berezia.

Bezeroei banatutako txartelekin zozketa egingo dute. 1.500 euro eta afari bat izango da saria

Aspaldi honetan herriko merkatariek ahalegin berezia egiten dihardute bezeroak saritzeko



Argazkian, estankoko langile bat bezero bati Gabonetako txartela eskaintzen.

Eguenero, autobidearen gaineko arreta zerbitzua

I.B.


Udala eta Bidegi hasiak dira autobidearen gaineko batzarrek egiten. Egindako batzarrean, hainbat erabaki hartu zituzten. Besteak beste, adostu zuten eguenero Euroestudios enpresako segurtasun arduradunak arreta egingo diela autobidearen gainean kezka dituztenei, 17:00etatik 18:00etara.

Hori da Udalak eta Bidegi hartutako erabakien artean garrantzitsuenetako bat. Ezagun da autobidearen gainean kezka handia dagoela herrian, eta zaila dela Bidegirengana jotzea. Hori guztia zelanbait bideratzeko, Bidegi eta Udalak erabaki zuten astean egun baten herritarrei arreta ematea. Hortaz, eguene-

ro, lanen zuzendaritza daraman Euroestudios enpresako segurtasun arduradunak arreta egingo die gura duten herritarrei, 17:00etatik 18:00etara, udaletxean. Horren barruan sartuko dira desjabetzeak, leherketek eragindako kalteak eta beste.

UDALAK JARRAIPENA EGINGO DU

Udalak aditzera eman du herritarrek aurkeztutako kezka, eskaera eta kexa horien guztien jarraipena Udalak berak ere egingo duela. Horrez gain, eza-gutzera eman zuten norbaitek Udalaren bitartez eskaera, kexa edo bestelakoak helarazi gura baditu, Udala prest dagoela bitartekari edo igorle lana egiteko. Horretarako, prest dituzte agiri eredu batzuk. Gura duenak jo dezala informazio eske.



TAFYD eta irakasle eskolako ikasleak Alemanian

Lanbide Heziketan, TAFYD eta HUHEZIn ikasle direnak Alemanian izan dira. Hango Alice-Salomon institutuarekin elkartrukea egin dute. 18 eta 20 urte bitarteko hementzi ikasle joan dira.

Ekimen hori Comenius proiektuaren barruan dago, eta helburua izan da bi herrialdeetako kirol politika, kirol ekintza eta kirol begiraleen lan esparruak aztertzea. Alemanian hogeita sei ikaslerekin elkartrukatu dituzte esperientziak.

Bi astean Alemaniako ikasleen etxeetan bizitzeko aukera izan dute, eta hango kultura eta hizkuntza ezagutu dituzte./ I.B.

ELKARRIZKETA

NAIARA ERRASTI/DISEINATZAILEA

*"Kristala eta argazkia erabili ditut,
eta horiei diseinu grafiko aplikatu"*

IKER BARANDIARAN

Naiara Errasti eskoria-tzarrak urte dezente darama isilean hainbat lan egiten. Orain dela gutxi Mario Padillaren omenezko lana egin zuen. Horrez gain, diseinu grafiko, margolanak, ilustrazioak eta beste egiten ditu.

Ezagutzen duzu Mario Padilla?

Bai, baina bere lanarengatik, txistularia delako eta herrian egin duen guztiarengatik. Berarekin lehenengo aldiz egon nintzen argazki batzuk egin nizkiolako. Hala ere, familian badago berarekin txistua jo duenik.

Ilusioa egin zizun bere omenezko lana egiteak?

Bai, oso gizon langilea eta umila delako, eta lana zelan egiten duen gustuko dudalako. Horrez gain, musika-zalea ere banaiz, eta horren guztiaren gaineko lana egitea oso interesgarria iruditu zitzaidan.

Herriko artista batzuen artean zure lana aukeratu zuten...

Bai, Udalak herriko artista talde txo batera jo zuen, eta hiru lagunok osatzen dugu talde txoa. Lan bana aurkeztu genuen, eta Udalak nirea aukeratu zuen.

Idea oso argi zenuen ala asko garatu behar izan duzu?

Hiru ideia artean zalantza izan nuen. Besteak beste, hiru dimentsiotako eskultura bat egitea aztertu nuen. Azkenean, kontuan hartu nuen lana urbanizazio baten barruan egongo zela, eta beste zerbait bururatu zitzaidan. Hala ere, urbanizazioa zertan geldituko zen zehatz jakin gura nuen arren, oraindik bukatu barik zegoen, lana aspaldi enkargatu zigutelako.


Lurra egokia iruditu zitzaidan lana ikusteko, zapaltzeko... Argia erabili nuen, lana egunez eta gauez ikusi ahal izateko. Azken finean, kristala eta argia izan dira elementuak eta horri guztiari diseinu grafiko aplikatu diot lana borobiltzeko.

Diseinuko lanak egiteaz gain, ze beste arte-sorkuntza egiten duzu?

Arte Ederrak ikasi nituen, baina horren ostean Diseinu Grafiko ikasi nuen, besteak beste. Aspaldian diseinu grafikoaren alorrean egiten dut lan, batez ere. Hala ere, marrazkiak eta ilustrazioak ere egiten ditut. Batzuetan enkarguz, baina kasu gehienetan niretzat margotzen dut.

Lehiaketetan aurkezteko ohiturarik badaukazu?

Oso gutxi. Adibidez, Bilboko Aratusteetako eta San Fermine-tako horma-irudien lehiaketetan



*"Mario Padillaren
eta musikaren
gaineko lana egitea
oso interesgarria
iruditu zitzaidan"*

*"Lehiaketa baten
esku hartzeko asko
motibatu behar nau.
Gaiak zeresan
handia dauka"*

esku hartu izan dut, baina ez dut inoiz ezer irabazi. Hala ere, ez naiz lehiaketak egiten dituzten adi egoten. Ez daukat esku hartzeko ohitura handirik, lehiaketak berak motibatu behar nau. Nire iritziz, motibatze oso garrantzitsuak izaten dira gaia eta sariak ere bai. Askok lan handia izaten dute, eta hori zelanbait ordaindu edo saritu egin beharra dago.

Zure margolanak erakusteko ohiturarik baduzu?

Ez handirik. Aspaldi egin nuen margolanen erakusketa bat herrian. Hala ere, badut gogoia etorkizunean beste bat egiteko. Baditut etxean hainbat lan gordeta. Guztiak batu eta aukeraketa ona egin beharko nuke. Denbora emango dit, baina egingo nuke.

Besteak beste, espazio diseinua egiten duzula aipatu izan

duzu. Zer da zehazki espazio diseinua?

Gasteizen master bat egin nuen espazioen diseinua eta antolaketa egiteko. Ferietan, erakusketetan gauzak zelan antolatu eta zelan aurkeztu asmatzen dut. Argiztapenarekin eta eszenografiarekin asko jokatzen dut. Arlo horretan hainbat lan egin ditut herrian eta beste leku batzuetan, eta interesgarria da.

Hortaz, ofizioa zaletasuna daukazu ala alderantziz?

Alderantziz. Txikitatik oso argi nuen marraztea oso gustuko nuela, eta oso gaztetan erabaki nuen Arte Ederrak edo Arkitektura ikastea. Biak oso gustuko ditut. Azkenean, Diseinu Grafiko ikasten nabil. Ez da arte sorkuntza zehatza, baina badu zerbait, eta gustatzen zait.

LABUR

Gaur, egubakoitza, Nabarralde elkartekoen Nafarroaren gaineko berbaldea egingo dute

Gaur, egubakoitza, izango da, 22:00etan, Ibarraundi museoan. Nabarralde elkarteko Mikel Sorauarenek *Historia de Navarra: el estado vasco* berbaldea egingo du. Hain zuzen, Nabarralde elkarteak lan egiten du Nafarroaren historia berreskuratzeko. Solauarenek berak hainbat liburu argitaratu ditu: *Navarra y el mito constitucional, ¿Es Navarra una nación?, Fueros y mejoramiento...* Aitzorrotz kultura elkarteak antolatu du berbaldea.

Eguenetik zapatura bitartean bigarren eskuko azoka, gazte batzarraren eskutik

Gazte batzarra bigarren eskuko azoka prestatzen dabil. Hilaren 22an, eguena, 23an eta 24an egingo dute. Lehenengo bi egunetan goizez eta arratsaldez eta azkenekoan, goizez bakarrik. Besteak beste, arropak, CDak, liburuak eta jostailuak batzen ibili dira, eta salgai jarriko dituzte kultura etxeko gela baten -lehenengo KZgunean-. Azokaren helburua da etxean erabili barik dauden gauzei irtenbidea ematea, birziklapena bultzatzea eta Gabonetan diru gutxirekin opariak egiteko aukera ematea. Orain dela bi urte, beste azoka bat egin zuten, baina oraingo handiagoa izango da.

Iñigo Urrutiarena izan da Christmas Digital saritua

I.B.

Iñigo Urrutiaren marrazki animatua izan da Eskoriatzako Christmas Digitalen I. Lehiaketan saria jaso duena. Guztira 36 lan aurkeztu dituzte lehiaketan, eta guztiak erabilgarri daude gura duenak mezu elektronikoen erabil ditzen.

Iñigo Urrutia eskoriatzarrak irabazi du Christmas Digitalen I. Lehiaketa. Urrutiak hainbat sari jaso ditu aspaldian: Arrasateko Santamasetako horma-irudiaren lehiaketa berak irabazi du eta Arrasateko San Juanetako saria ere berak eskuratu zuen.

Urrutiak marrazki animatua egin zuen Christmas Digitalen Lehiaketarako, eta hori izan da epaimahaiak gustuko izan duena. Horregatik, 300 euroko saria jasoko du Urrutiak.

Udalak aditzera eman du honako alderdiak neurtu dituztela aurkeztutako lanen artean aukeratzeko: Gabonak zoriontzeko mezua argitasunez ematea;

mezua erabilgarria izatea, hau da, posta elektronikoz bidaltzeko pisu handirik ez izatea; erabilitako euskara zuzena izatea; eta orijinaltasuna, hain zuzen ere.


POZIK HARRERAREKIN

Udalak aditzera eman du oso pozik daudela lehiaketak izan duen harrerarekin. 14 lagunek eman dute izena, eta guztira 36 lan aurkeztu dituzte. Gehienak eskoriatzarrak izan diren arren, Donostiatik, Urretxutik, Eibartik, Aretxabaletatik eta Bergaratik ere heldu dira lanak.

Horrez gain, Udalak azpimarratu du aukeraketa zaila izan dela, eta oso lan txukunak jaso dituztela.

CHRISTMAS DIGITALAK, ERABILGARRI

Gura duenak Eskoriatzako Udaleko webgunera (www.eskoriatza.net) sartu eta aukera izango du gustuko duen postalara erabili eta Gabon zoriontsuak opa gura dizkionari bidaltzeko. Ikusgai eta erabilgarri daude lehiaketara aurkeztu diren Christmas guztiak.



MARI KARMEN ARRIETA

Iñigo Urrutia pozik dago marrazki animatuak izan duen harrerarekin.